



ქალაქ თბილისის მუნიციპალიტეტის საკრებულო



დადგენილება № 5-4

„ 5 „დეკემბერი 2017“

ა. თბილისი

„ქალაქ თბილისის მუნიციპალიტეტის საკრებულოს რეგლამენტის დამტკიცების შესახებ“ ქალაქ თბილისის მუნიციპალიტეტის საკრებულოს 2014 წლის 19 ივლისის №2-1 დადგენილებაში ცვლილებებისა და დამატებების შეტანის შესახებ

საქართველოს ორგანული კანონის „ადგილობრივი თვითმმართველობის კოდექსი“ 61-ე მუხლის მე-2 პუნქტისა და „ნორმატიული აქტების შესახებ“ საქართველოს კანონის მე-20 მუხლის მე-4 პუნქტის შესაბამისად, ქალაქ თბილისის მუნიციპალიტეტის საკრებულო ადგენს:

მუხლი 1. შეტანილ იქნეს ცვლილება „ქალაქ თბილისის მუნიციპალიტეტის საკრებულოს რეგლამენტის დამტკიცების შესახებ“ ქალაქ თბილისის მუნიციპალიტეტის საკრებულოს 2014 წლის 19 ივლისის №2-1 დადგენილებაში (ვებგვერდი: www.matsne.gov.ge, 19.07.2014წ. სარეგისტრაციო კოდი: 010250040.35.101.016001) და დადგენილებით დამტკიცებულ რეგლამენტში განხორციელდეს შემდეგი სახის ცვლილებები:

ა) მე-6 მუხლის მე-3 პუნქტის „გ“ ქვეპუნქტი ჩამოყალიბდეს შემდეგი რედაქციით:
„გ) სასამართლომ უგზო-უკვლოდ დაკარგულად აღიარა, გარდაცვლილად გამოაცხადა ან მხარდაჭერის მიმღებად ცნო.“

ბ) მე-7 მუხლი ჩამოყალიბდეს შემდეგი რედაქციით:

„მუხლი 7

1. თუ საკრებულოს წევრი/თანამდებობის პირი ზედიზედ 6 თვის განმავლობაში არ მონაწილეობს საკრებულოს მუშაობაში ან არღვევს კანონით განსაზღვრულ თანამდებობრივი შეუთავსებლობის მოთხოვნებს, საკრებულოს იურიდიულ საკითხთა და ადამიანის უფლებათა დაცვის კომისია არკვევს გაცდენის მიზეზს ან/და დაუყოვნებლივ ამოწმებს/გამოითხოვს ინფორმაციას თანამდებობრივი შეუთავსებლობის ფაქტის დასადასტურებლად. იურიდიულ საკითხთა და ადამიანის უფლებათა დაცვის კომისია შეუთავსებლობის საკითხზე დასკვნას უახლოეს სხდომაზე წარუდგენს საკრებულოს. თუ დადასტურდა, რომ გაცდენის მიზეზი არასაპატიოა ან საკრებულოს წევრი/თანამდებობის პირი არღვევს თანამდებობრივი შეუთავსებლობის მოთხოვნებს საკრებულო იღებს გადაწყვეტილებას საკრებულოს წევრისთვის/თანამდებობის პირისთვის უფლებამოსილების ვადამდე შეწყვეტის შესახებ. ეს გადაწყვეტილება ძალაშია შესაბამისი ვადის (6 თვის) გასვლის/თანამდებობრივი შეუთავსებლობის ფაქტის დადგომის მომდევნო დღიდან.

2.საკრებულოს წევრის მიერ საკრებულოს მუშაობაში მონაწილეობის მიუღებლობის საპატიო მიზეზად ითვლება ავადმყოფობა, ოჯახური მდგომარეობა, სამსახურებრივი მივლინება. აღნიშნული მიზეზების თაობაზე სხდომამდე ინფორმირებული უნდა იყოს შესაბამისი ფრაქციისა და კომისიის თავმჯდომარე - ფრაქციისა და კომისიის სხდომის გაცდენის შემთხვევაში. საკრებულოს წევრის მიერ საკრებულოს სხდომის გაცდენის შემთხვევაში ინფორმირებული უნდა იყოს შესაბამისი ფრაქციის თავმჯდომარე, რომელიც ვალდებულია გაცდენის თაობაზე შეატყობინოს საკრებულოს თავმჯდომარეს. აღნიშნულ შემთხვევაში საკრებულოს წევრს საკრებულოს მუშაობაში მონაწილეობის მიუღებლობა ეთვლება საპატიოდ. საკრებულოს ის წევრი, რომელიც არ არის არცერთ ფრაქციაში გაერთიანებული, აღნიშნულ ინფორმაციას მიაწოდებს საკრებულოს თავმჯდომარეს.

3. საკრებულოს წევრს საკრებულოს სხდომა არასაპატიო მიზეზით გაცდენილად არ ჩაეთვლება, თუ ის პოლიტიკური შეხედულებების გამო უარს აცხადებს საკრებულოს სხდომაზე საკითხების განხილვა-გადაწყვეტაში მონაწილეობის მიღებაზე. აღნიშნულის თაობაზე წერილობითი განცხადება წარედგინება საკრებულოს თავმჯდომარეს ან კეთდება ზეპირი განცხადება რეგისტრაციის დასრულების შემდეგ საკრებულოს სხდომაზე.

4. თუ საკრებულოს წევრს შეუწყდა საქართველოს მოქალაქეობა, სასამართლომ უგზო-უკვლოდ დაკარგულად აღიარა, გარდაცვლილად გამოაცხადა ან მხარდაჭერის მიმღებად ცნო საკრებულოს იურიდიულ საკითხთა და ადამიანის უფლებათა დაცვის კომისია აღნიშნული ფაქტის გამოვლენის შემთხვევაში შესაბამისი ორგანოებიდან გამოითხოვს ამ ფაქტის დამადასტურებელ საბუთებს, ამზადებს დასკვნას და წარუდგენს საკრებულოს უახლოეს სხდომას. აღნიშნული ფაქტების შესახებ ინფორმაციას საკრებულო ცნობად იღებს და აფორმებს საკრებულოს სხდომის საოქმო ჩანაწერით.

5. თუ საკრებულოს წევრის მიმართ კანონიერ ძალაში შევიდა საბოლოო ინსტანციის სასამართლოს გამამტყუნებელი განაჩენი ან გავიდა კანონიერ ძალაში შესული სასამართლოს გამამტყუნებელი განაჩენის ზემდგომი ინსტანციის სასამართლოში გასაჩივრების ვადა, საკრებულოს იურიდიულ საკითხთა და ადამიანის უფლებათა დაცვის კომისია გამოითხოვს განაჩენს, ამზადებს დასკვნას და წარუდგენს საკრებულოს უახლოეს სხდომას. აღნიშნული ფაქტების შესახებ ინფორმაციას საკრებულო ცნობად იღებს და აფორმებს საკრებულოს სხდომის საოქმო ჩანაწერით.

6. საკრებულოს წევრის მიერ უფლებამოსილების მოხსნის შესახებ წერილობითი განცხადება წარედგინება საკრებულოს თავმჯდომარეს, რომელიც დაუყოვნებლივ გადასცემს მას საკრებულოს იურიდიულ საკითხთა და ადამიანის უფლებათა დაცვის კომისიას. კომისია ადგენს განცხადების ნამდვილობას, გარემოებას რომელიც დაედო საფუძვლად განცხადებას და შესაბამის დასკვნას წარუდგენს საკრებულოს. აღნიშნული ფაქტის შესახებ ინფორმაციას საკრებულო ცნობად იღებს და აფორმებს საკრებულოს სხდომის საოქმო ჩანაწერით.

7. საკრებულოს წევრის უფლებამოსილების შეწყვეტის მომენტად ითვლება შესაბამისი განცხადების რეგისტრაციის მომდევნო დღე.

8. საკრებულოს წევრის გარდაცვალების შემთხვევაში საკრებულოს იურიდიულ საკითხთა და ადამიანის უფლებათა დაცვის კომისია გამოითხოვს გარდაცვალების მოწმობას და საკრებულოს უახლოეს სხდომაზე წარადგენს, რომელიც იღებს ცნობის სახით და აფორმებს საკრებულოს სხდომის საოქმო ჩანაწერით.

9. მე-6 მუხლის მე-3 პუნქტით გათვალისწინებულ შემთხვევებში, გარდა იმავე პუნქტის „ე“ და „ვ“ ქვეპუნქტებით განსაზღვრული შემთხვევებისა საკრებულოს წევრს/თანამდებობის პირს უფლებამოსილება ვადამდე უწყდება შესაბამისი ფაქტის დადგომის მომდევნო დღიდან.

10. საკრებულოს წევრის უფლებამოსილების ცნობის საკითხს, რეგლამენტით დადგენილი წესით შეისწავლის და განიხილავს იურიდიულ საკითხთა და ადამიანის უფლებათა დაცვის კომისია, რომელიც ამზადებს დასკვნას და წარუდგენს საკრებულოს.

11. საკრებულოს წევრის უფლებამოსილების ცნობასთან ან შეწყვეტასთან დაკავშირებული საკითხები საკრებულოს სხდომაზე განიხილება რიგგარეშედ.”

გ) მე-16 მუხლი ამოღებულ იქნეს;

დ) რეგლამენტს დაემატოს შემდეგი შინაარსის თავი II¹:

„თავი II¹ მაჟორიტარული სისტემით არჩეული ქ.თბილისის მუნიციპალიტეტის საკრებულოს წევრის წარმომადგენლობა

მუხლი 15¹

მაჟორიტარული სისტემით არჩეული საკრებულოს წევრის (შემდგომ მაჟორიტარი საკრებულოს წევრი) საარჩევნო ოლქის ტერიტორიაზე ქალაქ თბილისის მუნიციპალიტეტის საკრებულო მაჟორიტარი საკრებულოს წევრის უფლებამოსილების ვადით ქმნის წარმომადგენლობას.

მუხლი 15²

1. წარმომადგენლობის მიზანია მოსახლეობისთვის საკრებულოს მაჟორიტარ წევრთან შესაბამის საარჩევნო ოლქში კომუნიკაციის ხელმისაწვდომი პლატფორმის არსებობა.

2. წარმომადგენლობის ძირითადი ამოცანებია:

ა) ამომრჩევლებთან შეხვედრების ორგანიზება;

ბ) ადგილობრივი თვითმმართველობის ორგანოების საქმიანობასა და ადგილობრივი საკითხების გადაწყვეტაში მაჟორიტარი საკრებულოს წევრის მონაწილეობის ხელშეწყობა;

გ) ადგილობრივი თვითმმართველობის განხორციელებაში, მუნიციპალიტეტისათვის მნიშვნელოვანი საკითხების განხილვასა და გადაწყვეტაში საზოგადოების ჩართულობის გაზრდის ხელშეწყობა.

მუხლი 15³

წარმომადგენლობა თავისი მიზნის განსახორციელებლად უზრუნველყოფს:

ა) საკრებულოს მაჟორიტარი წევრის მოქალაქეებთან შეხვედრის (მათ შორის საჯარო შეხვედრის) ორგანიზებას;

ბ) მოქალაქეთა წერილების, საჩივრების, განცხადებების საქმისწარმოების ერთიან ელექტრონულ აღრიცხვას, შესწავლას, მასში დასმული საკითხების ანალიზის შედეგად მომზადებული სათანადო დასკვნის რეკომენდაციის ან/და წინადადებების შესაბამისი მაჟორიტარი საკრებულოს წევრისთვის წარდგენას;

გ) მაჟორიტარი საკრებულოს წევრის ხელშეწყობას საკანონმდებლო ან/და აღმასრულებელი ხელისუფლების წარმომადგენლებთან, ადგილობრივი თვითმმართველობის ორგანოებთან, კერძო/საჯარო დაწესებულებებთან, საერთაშორისო და საზოგადოებრივ ორგანიზაციებთან, მედია საშუალებებთან ურთიერთობისას;

დ) მაჟორიტარი საკრებულოს წევრის ხელშეწყობას კანონის შესაბამისად ანგარიშის წარდგენაში;

ე) მაჟორიტარი საკრებულოს წევრის ორგანიზაციულ-ტექნიკურ მომსახურებას;

ვ) მაჟორიტარი საკრებულოს წევრისთვის სამაჟორიტარო ოლქში არსებული პრობლემებისა და აქტუალური საკითხების იდენტიფიცირებაში, მათი აღმოფხვრისა და

გადაწყვეტის მაჟორიტარის უფლებამოსილების ვადის პერიოდით გეგმის შემუშავებაში ხელშეწყობას;

ზ) წარმომადგენლობის საქმიანობისთვის საჭირო სხვა ფუნქციების განხორციელებას.

მუხლი 15⁴

1. წარმომადგენლობის შემადგენლობა განისაზღვრება არანაკლებ 3 და არაუმეტეს 6 თანამშრომლისაგან, რომელთაგან ერთ-ერთი ასრულებს წარმომადგენლობის ხელმძღვანელის ფუნქციებს, ხოლო დანარჩენი დასაქმებული თანამშრომლები იკავებენ სპეციალისტის თანამდებობებს.

2. წარმომადგენლობაში თანამშრომელთა მიღება ხდება „საჯარო სამსახურის შესახებ“ საქართველოს კანონით დადგენილი წესით და მათთან შრომით ხელშეკრულებას დებს ქალაქ თბილისის მუნიციპალიტეტის საკრებულოს თავმჯდომარე.

3. წარმომადგენლობის თანამშრომლების უფლება/მოვალეობები და ანაზღაურების წესი განისაზღვრება მათთან დადებული შრომითი ხელშეკრულებით, თუ კანონით სხვა რამ არ არის გათვალისწინებული.

მუხლი 15⁵

1. ამ რეგლამენტის 15³ მუხლის „ვ“ და 15² მუხლის „გ“ ქვეპუნქტების მიზნებისთვის საკრებულოს მაჟორიტარი წევრი უფლებამოსილია 3 თვეში ერთხელ საყოველთაო განხილვის ფორმატში შეხვედეს მოსახლეობას/ამომრჩეველს.

2. ამ მუხლის პირველი პუნქტის შესაბამისად ჩატარებული შეხვედრის შესახებ შედგება ოქმი, რომელსაც ხელს აწერს შესაბამისი მაჟორიტარი და წარმომადგენლობის ხელმძღვანელი.

მუხლი 15⁶

1. წარმომადგენლობის ფუნქციონირებისთვის ქ. თბილისის ბიუჯეტიდან ქ. თბილისის მუნიციპალიტეტის საკრებულოსთვის განსაზღვრული ასიგნებების ფარგლებში ყოველთვიურად გამოიყოფა 5000 ლარი. მაჟორიტარი საკრებულოს წევრი საკრებულოს აპარატს წინასწარ, კვარტალში ერთხელ წარუდგენს მომდევნო კვარტალში განსახორციელებელი ხარჯების ძირითად პარამეტრებს. აღნიშნული 5000 ლარიდან ქ. თბილისის მუნიციპალიტეტის საკრებულოს აპარატი მაჟორიტარი საკრებულოს წევრის წარდგინებით ახორციელებს:

ა) ფუნქციონირებისათვის საჭირო მატერიალურ – ტექნიკური და სხვა ძირითადი საშუალებების შეძენას;

ბ) კანონმდებლობით დადგენილი წესით საოფისე ფართობის დაქირავებას და გამქირავებლისათვის შესაბამისი თანხის ანაზღაურებას;

გ) მაჟორიტარი საკრებულოს წევრის საქმიანობასთან დაკავშირებული სხვადასხვა ორგანიზაციულ-ტექნიკური საკითხების უზრუნველყოფას;

დ) წარმომადგენლობაში დასაქმებულთა შრომის ანაზღაურებას.

2. ამ მუხლით გათვალისწინებული 5000 ლარის სრულად აუთვისებლობის შემთხვევაში საკრებულოს მაჟორიტარი წევრის მოთხოვნის საფუძველზე დარჩენილი თანხა შესაძლებელია გამოყენებულ იქნეს შემდეგ თვეებში.

3. საკრებულოს მაჟორიტარ წევრს, მისი უფლებამოსილების ვადის განმავლობაში, ქ. თბილისის ბიუჯეტიდან ქ. თბილისის მუნიციპალიტეტის საკრებულოსთვის განსაზღვრული ასიგნებების ფარგლებში საჭიროების შემთხვევაში დამატებით ერთჯერადად გამოეყოფა 3000 ლარი წარმომადგენლობის ოფისის მოსაწყობად.

საკრებულოს მაჟორიტარი წევრის წარდგინებით, გამოყოფილი თანხის შესაბამისად ქ. თბილისის საკრებულოს აპარატი უზრუნველყოფს ნივთების შექმნას.

4. შექმნილი მატერიალურ – ტექნიკური საშუალებები არის ადგილობრივი თვითმმართველი ერთეულის – ქ. თბილისის საკუთრება (საკრებულოს აპარატის ბალანსზე რიცხული) საქართველოს კანონმდებლობით დადგენილი წესით.”

ე) მე-19 მუხლის:

ე.ა) პირველი პუნქტის „ა“ ქვეპუნქტი ჩამოყალიბდეს შემდეგი რედაქციით:

„ა) იურიდიულ საკითხთა და ადამიანის უფლებათა დაცვის“

ე.ბ) პირველი პუნქტის „დ“ ქვეპუნქტი ამოღებულ იქნეს.

ე.გ) პირველ პუნქტს დაემატოს „მ“ ქვეპუნქტი და ჩამოყალიბდეს შემდეგი რედაქციით:

„მ) სატრანსპორტო საკითხთა“

ე.დ) მე-2 პუნქტი ჩამოყალიბდეს შემდეგი რედაქციით:

„2. იურიდიულ საკითხთა და ადამიანის უფლებათა დაცვის კომისია ამზადებს და საკრებულოს წარუდგენს დასკვნებს საკრებულოს მიერ განსახილველი სამართლებრივი აქტების პროექტების საქართველოს კანონმდებლობასთან შესაბამისობის თაობაზე. აკონტროლებს საკრებულოს ცალკეული სამართლებრივი აქტებისა და პროცედურული საკითხების შესაბამისობას რეგლამენტთან, შეიმუშავებს და საკრებულოს წარუდგენს სამართლებრივი აქტების პროექტებს, დასკვნებს წინამდებარე რეგლამენტი გათვალისწინებულ სხვა საკითხებზე, ასევე, შეიმუშავებს ადამიანის უფლებათა დაცვისა და სამოქალაქო ინტეგრაციის სფეროში საკრებულოს სამართლებრივი აქტების პროექტებს და დასკვნებს, განიხილავს ადამიანის უფლებათა დარღვევებთან დაკავშირებულ საჩივრებსა და განცხადებებს.“

ე.ე) მე-5 პუნქტი ამოღებულ იქნეს.

ე.ვ) მე-13 პუნქტი ჩამოყალიბდეს შემდეგი რედაქციით:

„13. სატრანსპორტო საკითხთა კომისია შექმნილია დედაქალაქში არსებული ტრანსპორტის მოძრაობის ორგანიზებისა და კონტროლის საკითხების განხილვის, სატრანსპორტო სფეროში შემავალი საკითხების შესწავლისა და მუდმივი მონიტორინგის, ტრანსპორტის საკითხებთან დაკავშირებული სამართლებრივი აქტების პროექტებისა და დასკვნების შემუშავების, აგრეთვე, ქალაქ თბილისის მუნიციპალიტეტის ადმინისტრაციულ საზღვრებში სატრანსპორტო საშუალებებისა და ქვეითთა მოძრაობის ორგანიზების გასაუმჯობესებელ ღონისძიებათა შესახებ წინადადებების შემუშავებისა და განხორციელების მიზნით.“

ე.ზ) მე-13 პუნქტი განისაზღვროს მე-14 პუნქტად და შესაბამისად მე-14 პუნქტი ჩამოყალიბდეს შემდეგი რედაქციით:

„14. საკრებულოს კომისიების დამატებითი უფლებამოსილებანი განისაზღვრება კომისიების დებულებებით.“;

ვ) 29-ე მუხლის მე-3 პუნქტი ჩამოყალიბდეს შემდეგი რედაქციით:

„3. კომისიის გადაწყვეტილებები წარედგინება საკრებულოს სხდომას და/ან იგზავნება დანიშნულებისამებრ. კომისიის გადაწყვეტილებები ასევე ეგზავნება იურიდიულ საკითხთა და ადამიანის უფლებათა დაცვის კომისიას“

ზ) 31-ე მუხლის მე-3 პუნქტი ჩამოყალიბდეს შემდეგი რედაქციით:

„3. კომისიის სამდივნოს შემადგენლობაში შედიან კომისიის სამდივნოს უფროსი, აპარატის საშტატო ნუსხით გათვალისწინებული მოსამსახურეები, ასევე შრომითი ხელშეკრულებით დასაქმებული პირები და საზოგადოებრივ საწყისებზე მოწვეული სპეციალისტები.“

თ) 35-ე მუხლის:

თ.ა) მე-3 პუნქტი ჩამოყალიბდეს შემდეგი რედაქციით:

„3. ფრაქციის რეგისტრაციისათვის, ფრაქციის შექმნიდან ერთი კვირის ვადაში ფრაქციის თავმჯდომარე მიმართავს საკრებულოს თავმჯდომარეს განცხადებით, რომელშიც მითითებულია ფრაქციის ოფიციალური სახელწოდება, მისი თავმჯდომარის, ფრაქციის თავმჯდომარის მოადგილის (მოადგილეების), მდივნის და წევრთა ვინაობა. განცხადებას ერთვის ფრაქციის პოლიტიკური პლატფორმა და ფრაქციის ყველა წევრის მიერ ხელმოწერილი წესდება. საკრებულოს თავმჯდომარე ფრაქციის რეგისტრაციისათვის შემოსულ მასალებს დაუყოვნებლივ გადასცემს იურიდიულ საკითხთა და ადამიანის უფლებათა დაცვის კომისიას, რომელიც თავის დასკვნას წარუდგენს საკრებულოს ბიუროს უახლოეს სხდომაზე. თუ ბიურო იურიდიულ საკითხთა და ადამიანის უფლებათა დაცვის კომისიის დასკვნის განხილვისას არ მიიღებს სხვა მოტივირებულ გადაწყვეტილებას, ფრაქცია რეგისტრაციაში გატარებულად ჩაითვლება საკრებულოს თავმჯდომარისათვის დოკუმენტაციის წარდგენის მომენტიდან.“

თ.ბ) მე-6 პუნქტი ჩამოყალიბდეს შემდეგი რედაქციით:

„6. თუ ფრაქციიდან წევრთა გასვლის ან გარიცხვის შედეგად მასში გაერთიანებული დარჩა საკრებულოს სამ წევრზე ნაკლები, ფრაქცია გაუქმებულად ჩაითვლება, რის თაობაზეც იურიდიულ საკითხთა და ადამიანის უფლებათა დაცვის კომისია უახლოეს სხდომაზე აცნობებს საკრებულოს ბიუროს. ამასთან, აღნიშნულის შესახებ საკრებულოს თავმჯდომარე საკრებულოს უახლოეს სხდომაზე აცნობებს საკრებულოს წევრებს.“

ი) 36-ე მუხლის მე-3 პუნქტი ჩამოყალიბდეს შემდეგი რედაქციით:

„3. ფრაქციაში ახალი წევრის მიღების შესახებ ფრაქციის თავმჯდომარე სამი დღის ვადაში წერილობით ატყობინებს იურიდიულ საკითხთა და ადამიანის უფლებათა დაცვის კომისიას და საკრებულოს აპარატს.“

კ) 37-ე მუხლის:

კ.ა) პირველი პუნქტი ჩამოყალიბდეს შემდეგი რედაქციით:

„1. საკრებულოს წევრს უფლება აქვს ყოველგვარი მოტივაციის გარეშე, ნებისმიერ დროს გავიდეს ფრაქციის შემადგენლობიდან, რის შესახებაც სამი დღის ვადაში წერილობით ატყობინებს იურიდიულ საკითხთა და ადამიანის უფლებათა დაცვის კომისიას, რომელიც აღნიშნულ ფაქტს უახლოეს სხდომაზე აცნობებს საკრებულოს.“

კ.ბ) მე-3 პუნქტი ჩამოყალიბდეს შემდეგი რედაქციით:

„3. ფრაქციიდან წევრის გარიცხვის შესახებ ფრაქციის თავმჯდომარე წერილობით ატყობინებს იურიდიულ საკითხთა და ადამიანის უფლებათა დაცვის კომისიას.“

კ.გ) მე-4 პუნქტი ჩამოყალიბდეს შემდეგი რედაქციით:

„4. ფრაქციის თავმჯდომარის, ფრაქციის თავმჯდომარის მოადგილეების და მდივნის არჩევის, გადაყენების, გადადგომის, აგრეთვე ფრაქციის სადამფუძნებლო დოკუმენტებში შესწორებათა შეტანის შესახებ სამი დღის ვადაში წერილობით ეცნობება საკრებულოს თავმჯდომარესა და იურიდიულ საკითხთა და ადამიანის უფლებათა დაცვის კომისიას.“

ლ) 67-ე მუხლის:

ლ.ა) მე-12 პუნქტი ჩამოყალიბდეს შემდეგი რედაქციით:

„12. შევსებული ხელმოწერების ფურცლებსა და ნორმატიული აქტის პროექტს განმარტებით ბარათთან ერთად საინიციატივო ჯგუფი სარეგისტრაციო დოკუმენტის მიღებიდან 20 დღის ვადაში წარუდგენს საკრებულოს თავმჯდომარეს, რომელიც ორი დღის ვადაში გადასცემს მათ იურიდიულ საკითხთა და ადამიანის უფლებათა დაცვის კომისიას. ნორმატიული აქტის პროექტი აგრეთვე გადაეცემა წამყვან კომისიას (კომისიებს).“

ლ.ბ) მე-13 პუნქტი ჩამოყალიბდეს შემდეგი რედაქციით:

„13. იურიდიულ საკითხთა და ადამიანის უფლებათა დაცვის კომისია ხელმოწერების ფურცლების მიღებიდან 5 დღის ვადაში, შერჩევითი პრინციპის საფუძველზე, ამოწმებს ხელმოწერების შესაბამისობას ამ მუხლის მოთხოვნებთან და შედეგებს წარუდგენს საკრებულოს ბიუროს უახლოეს სხდომას. თუ დადგინდა, რომ ხელმოწერები შესრულებულია ამ მუხლის მოთხოვნათა დარღვევით, რის გამოც ამ მუხლის მოთხოვნათა შესაბამისად შესრულებულ ხელმოწერათა რაოდენობა აღმოჩნდა ქალაქ თბილისის ტერიტორიაზე რეგისტრირებულ ამომრჩეველთა საერთო რაოდენობის 1 პროცენტზე ნაკლები, იურიდიულ საკითხთა და ადამიანის უფლებათა დაცვის კომისიის უარყოფითი დასკვნის საფუძველზე ბიურო უნარს ეუბნება საინიციატივო ჯგუფს ნორმატიული აქტის პროექტის საკრებულოს სხდომაზე განსახილველად წარდგენაზე. შესაბამისად, ნორმატიული აქტის პროექტის წარდგენის უფლების განხორციელება უარყოფილად ითვლება.“

ლ.გ) მე-15 პუნქტი ჩამოყალიბდეს შემდეგი რედაქციით:

„15. ამომრჩეველთა ხელმოწერების შესახებ იურიდიულ საკითხთა და ადამიანის უფლებათა დაცვის კომისიის დადებითი დასკვნა, წარმოდგენილი პროექტი, ამომრჩეველთა ხელმოწერები და ნორმატიული აქტის პროექტთან დაკავშირებით წამყვანი კომისიის (კომისიების) დასკვნა (დასკვნები) წარედგინება საკრებულოს ბიუროს, რომელსაც საკითხი შეაქვს საკრებულოს უახლოესი სხდომის დღის წესრიგში.“

მ) 68-ე მუხლის მე-5 პუნქტი ჩამოყალიბდეს შემდეგი რედაქციით:

„5. საკრებულოს აპარატის შესაბამისი განყოფილება ამზადებს სამართლებრივ დასკვნას, რომელიც პროექტთან ერთად ეგზავნება საკრებულოს იურიდიულ საკითხთა და ადამიანის უფლებათა დაცვის კომისიას, რომელიც კომისიის სხდომაზე განიხილავს წარმოდგენილ პროექტს აღნიშნულ დასკვნასთან ერთად.“

მუხლი 2. დადგენილება ამოქმედდეს 2017 წლის 8 დეკემბრიდან.

საკრებულოს თავმჯდომარე



გიორგი ტყემალაძე

განმარტებითი ბარათი

„ქალაქ თბილისის მუნიციპალიტეტის საკრებულოს რეგლამენტის დამტკიცების შესახებ“ ქალაქ თბილისის მუნიციპალიტეტის საკრებულოს 2014 წლის 19 ივლისის N2-1 დადგენილებაში ცვლილებებისა და დამატებების შეტანის შესახებ“ ქალაქ თბილისის მუნიციპალიტეტის საკრებულოს დადგენილების თაობაზე

1. ქ.თბილისის მუნიციპალიტეტის საკრებულოს დადგენილების პროექტის (შემდგომში პროექტი) მიღების (გამოცემის) მიზეზი და მისი ძირითადი დამახასიათებელი ნიშნები:

დღეისათვის ქალაქ თბილისის მუნიციპალიტეტში არსებული რეალობისა და გამოწვევების გათვალისწინებით, ასევე დედაქალაქის მართვის პოლიტიკის ოპტიმიზაციის მიზნით, მიზანშეწონილია ქალაქ თბილისის მუნიციპალიტეტის საკრებულოში სტრუქტურული ცვლილებების განხორციელება. კერძოდ, ადამიანის უფლებათა დაცვისა და სამოქალაქო ინტეგრაციის კომისიის იურიდიულ საკითხთა კომისიასთან გაერთიანება, ასევე ურბანული დაგეგმარებისა და საქალაქო მეურნეობის კომისიის კომპეტენციის სფეროდან ტრანსპორტის საკითხების გამოყოფა და საკრებულოს მიერ სატრანსპორტო სფეროში შემავალ საკითხებზე უფრო ეფექტური მუშაობის უზრუნველსაყოფად, სატრანსპორტო საკითხთა კომისიის ცალკე კომისიად ჩამოყალიბება.

ზემოაღნიშნულიდან გამომდინარე, დღის წესრიგში დადგა ქალაქ თბილისის მუნიციპალიტეტის საკრებულოს საქმიანობის მარეგულირებელ სხვადასხვა სამართლებრივ აქტებში, მათ შორის „ქალაქ თბილისის მუნიციპალიტეტის საკრებულოს რეგლამენტის დამტკიცების შესახებ“ ქალაქ თბილისის მუნიციპალიტეტის საკრებულოს 2014 წლის 19 ივლისის N2-1 დადგენილებაში, შესაბამისი ცვლილებების განხორციელების საკითხი.

ვინაიდან დაგეგმილი ცვლილებების მიხედვით, ფართოვდება იურიდიულ საკითხთა კომისიის კომპეტენციის სფერო, წარმოდგენილი ცვლილებების პროექტის შესაბამისად, ქალაქ თბილისის მუნიციპალიტეტის საკრებულოს რეგლამენტით იურიდიულ საკითხთა კომისიისათვის მინიჭებულ ფუნქციებს ემატება ადამიანის უფლებათა დაცვისა და სამოქალაქო ინტეგრაციის კომისიის საქმიანობის სფეროს მიკუთვნებული ფუნქციები და როგორც თავად იურიდიულ საკითხთა კომისიის სახელწოდება, ასევე მისი უფლება-მოვალეობები ყალიბდება ახალი რედაქციით.

ამასთან, საკრებულოს შემადგენლობაში ახალი, სატრანსპორტო საკითხთა კომისიის საქმიანობის სამართლებრივი რეგლამენტირების უზრუნველსაყოფად, ქალაქ თბილისის მუნიციპალიტეტის საკრებულოს N2-1 დადგენილებით დამტკიცებული რეგლამენტის მე-19 მუხლის მე-13 პუნქტი ყალიბდება ახალი რედაქციით, რომლითაც გაიწერება სატრანსპორტო საკითხთა კომისიის საქმიანობის სფეროს მიკუთვნებული საკითხები.

ასევე, მაჟორიტარული სისტემით არჩეული ქ.თბილისის მუნიციპალიტეტის საკრებულოს წევრის წარმომადგენლობის საქმიანობასთან დაკავშირებული საკითხების უფრო სრულყოფილად

დარეგულირების მიზნით წარმოდგენილი პროექტით, ქალაქ თბილისის მუნიციპალიტეტის საკრებულოს რეგლამენტს ემატება II¹ თავი, რომელიც უფრო კონკრეტულად განსაზღვრავს, როგორც მაჟორიტარი საკრებულოს წევრის წარმომადგენლობის მიზნებს, ფუნქციებსა და შემადგენლობას, ასევე წარმომადგენლობის ფუნქციონირებასთან დაკავშირებულ ფინანსურ საკითხებს. შესაბამისად, N2-1 დადგენილებით დამტკიცებული რეგლამენტის მე-16 მუხლი ამოღებულ იქნა.

აქვე აღსანიშნავია, რომ საქართველოს სამოქალაქო კოდექსსა და საქართველოს ორგანულ კანონში „ადგილობრივი თვითმმართველობის კოდექსი“ განხორციელებულმა ცვლილებებმა ((3339-IIს);(3401- IIს)), განაპირობა ცვლილების საჭიროება, ასევე „ქალაქ თბილისის მუნიციპალიტეტის საკრებულოს რეგლამენტის დამტკიცების შესახებ“ ქალაქ თბილისის მუნიციპალიტეტის საკრებულოს 2014 წლის 19 ივლისის N2-1 დადგენილებით დამტკიცებული რეგლამენტის მე-6 მუხლის „გ“ ქვეპუნქტსა და მე-7 მუხლის მე-4 პუნქტში, რომლებიც ასევე გათვალისწინებულია აღნიშნული პროექტით.

გარდა ამისა, „საჯარო სამსახურის შესახებ“ საქართველოს კანონთან შესაბამისობაში მოყვანის მიზნით, წარმოდგენილი პროექტით ცვლილება შედის აგრეთვე ქალაქ თბილისის მუნიციპალიტეტის საკრებულოს რეგლამენტის 31-ე მუხლის მე-3 პუნქტში, რაც განპირობებულია იმ ფაქტით, რომ „საჯარო სამსახურის შესახებ“ საქართველოს კანონში განხორციელებული ცვლილების თანახმად, კანონის მე-3 მუხლის „ვ“ ქვეპუნქტის შესაბამისად, შტატგარეშე მოსამსახურის დეფინიცია ჩაანაცვლა შრომითი ხელშეკრულებით დასაქმებული პირის დეფინიციამ.

ამრიგად, წარმოდგენილი პროექტით ცვლილებები შედის „ქალაქ თბილისის მუნიციპალიტეტის საკრებულოს რეგლამენტის დამტკიცების შესახებ“ ქალაქ თბილისის მუნიციპალიტეტის საკრებულოს 2014 წლის 19 ივლისის N2-1 დადგენილებით დამტკიცებული რეგლამენტის მე-6 მუხლის „გ“ ქვეპუნქტში; მე-7 მუხლში; მე-19 მუხლის პირველ, მე-2, მე-13 და მე-14 პუნქტებში; 29-ე მუხლის მე-3 პუნქტში; 31-ე მუხლის მე-3 პუნქტში; 35-ე მუხლის მე-3 და მე-6 პუნქტებში; 36-ე მუხლის მე-3 პუნქტში; 37-ე მუხლის პირველ, მე-3 და მე-4 პუნქტებში; 67-ე მუხლის მე-12, მე-13 და მე-15 პუნქტებში; 68-ე მუხლის მე-5 პუნქტში, ასევე, რეგლამენტს ემატება II¹ თავი.

2. პროექტის საფინანსო-ეკონომიკური გაანგარიშება:

პროექტის მიღება არ გამოიწვევს დამატებითი ხარჯების გამოყოფას ქალაქ თბილისის მუნიციპალიტეტის ბიუჯეტიდან.

3. პროექტის ავტორი:

იურიდიულ საკითხთა კომისიის თავმჯდომარე - ლევან ჟორჟოლიანი

4. პროექტის წარმდგენი: საკრებულოს თავმჯდომარე - გიორგი ტყემალაძე